

REGLAMAINT DA SCOLA

I. Perscripziuns generalas

Art. 1. Nom, purtader e sedia

Sot igl nom «Scola da musica Grischun Central» (SMGC) exista ena cumischung permanenta dalla Regiun Albula. Las statutas dalla Regiun Albula (RA) èn d'applitgier conform agls interess dalla scola da musica. Igl intschess dalla scola da musica è identic cun chel dalla Regiun Albula. La sedia dalla SMGC sa catta agl li d'uffezi dalla RA.

Art. 2. Scopo e pensum

Cun igl scopo da sviglier e mantignair igl plascheir per cant e musica tar igls unfants, giuvenils e carschias intenda la scola l'educaziun musicala ed igl svilup general digl unfant. Per chel scopo organisescha la scola da musica ena scolaziun fundamentala da musica, ena instrucziun instrumentala/vocala scu er sunar e cantar an ensembles. Chegl scu completaziun all'instrucziun da musica dalla scola populara.

La SMGC promova ena collaburaziun fritgevla cun uniuns da cant e musica dalla regiun. Per cass da basigns peglia ella l'iniziativa per organisar ulteriouras activitads da musica. Ella pò collaborar cun otras organisaziuns da madema fegnameira.

Art. 3. Lungatg uffizial

Lungatg uffizial e d'instrucziun dalla scola da musica Grischun Central è tudestg e rumantsch. Publicaziuns u otras circularas èn da publitgier an tots dus lungatgs. Per l'interpretaziun da protocols e corrispondenzas vala la formulaziun tudestga.

Art. 4. Infurmaziun e publicitad

La SMGC infurmescha dallas activitads per:

- Gasetta dalla scola da musica ed infos per genitours
- Internet
- Comunicaziuns da pressa
- La SMGC infurmescha regularmaintg la conferenza digls presidents dalla Regiun Albula

II. Organisaziun

Art. 5 Organisaziun dalla scola da musica Grischun Central

- Conferenza digls presidents (CP)
- Cumischun dalla scola da musica (CSM)
- Presidium dalla scola da musica
- Direcziun dalla scola da musica
- Secretariat dalla scola da musica
- Cumischung da gestiun (CG)

Art. 6 Cumpetenzas

1. Conferenza digls presidents

La conferenza digls presidents eligia la direcziun da scola. La conferenza digls presidents eligia la cumischung dalla scola da musica per en coz d'uffezi da 4 onns. La conferenza digls presidents approva igl chint annual ed igl preventiv.

2. Cumischun dalla scola da musica

La cumischun dalla scola da musica (CSM) cumpeggia mintgamai 2 commembers dallas subregiuns Albula, Lai e Surses. Tar convagnientschas da prestaziuns cumegnans ordvart la Regiun Albula ègl pussebel d'eliger en represchentant an la CSM. L'elecziun è tgossa dalla conferenza digls presidents. La cumischun dalla scola da musica sa constituescha sasez. La direcziun dalla scola da musica ed igl secretariat dalla scola da musica assistan allas sedutas cun vusch consultativa. Per tractandas spezialas vign anvido igl magna fatschenta dalla RA. Chel assista cun vusch consultativa.

Pensums e cumpetenzas

- represchantar la scola da musica agl exterior
- tgirar contacts cun las uniuns tetgalas da scolas da musica VSMG e VMS scu er uniuns da cant e musica
- collaburar cun la scola populara sen intschess da cant e musica
- elecziun digl secretariat dalla scola da musica
- survegilar igl travagl da scola
- relascher las ordinaziuns necessarias pigl travagl dalla scola da musica
- fixar las taxas da scola, la paia dalla direcziun da scola, la paia digl secretariat e l'indemnisaziun dalla magistraglia da musica
- elaborar igl preventiv per mang dalla CP
- approvaziun digl chint annual per mang dalla CP

- decider d'expensas tenor igl preventiv
- decider d'expensas unicas tgi na figureschan betg aint igl preventiv anfign tar en importo maximal da 5'000.- fr per onn
- L'indemnisaziun digls commebbers dalla cumischung dalla scola da musica è fixada aninten igl “Reglamaint d'indemnisaziun dalla cumischung dalla scola da musica Grischun Central”.

3. Presidium dalla scola da musica

Igl president dalla scola da musica anveida a las sedutas dalla CSM, magna chellas e surpeglia igls pensums tenor reglamaints e prescripziuns dalla SMGC. An cass d'impedimaint surpeglia igl vicepresident u en oter commember dalla CSM chels pensums. Igl president surpeglia la substituziun dalla direcziun da scola.

4. Direcziun dalla scola da musica

Alla direcziun dalla scola da musica surstat la direcziun musicala, pedagogica ed organisatorica. Ella vign surdada ad ena persunga digl rom e cumpetenta. Ella è responsabla pigl travagl da scola. La direcziun dalla scola da musica è sottomessa alla cumischun dalla scola da musica.

La direcziun dalla scola da musica adamplescha an spezial igls suandonts pensums:

- planisar, organisar e survigilar igl travagl da scola e digl secretariat
- tgirar e cunsigliar la magistraglia da musica
- promover e furmar gruppas instrumentalas/vocalas sen plang regiunal
- tgirar igls contacts tar genitours, scola populara, uniuns tetgalas da scolas da musica, uniuns da cant e musica
- elaborar propostas da planisaziun a curta e lunga vista per mang dalla CSM
- tschartger, disponer ed eliger scolasts/as da musica ansemen cun igl president dalla SMGC
- promover, organisar e realisar emdas da musica, exercezis practics, concerts e projects da musica
- assister allas sedutas dalla cumischun dalla scola da musica cun vusch consultativa
- ulteriurs pensums tenor la descripziun da funcziuns

5. Secretariat dalla scola da musica

Igl secretariat dalla scola da musica adamplescha an spezial igls suandonts pensums:

- assister allas sedutas dalla cumischun dalla scola da musica cun vusch consultativa
- protocollar las sedutas dalla CSM
- contabilitad (finanzas e paias)
- paiamaints
- lavours generalas da secretariat tenor descripziun da funcziuns
- ulteriurs pensums tenor la descripziun da funcziuns

6. Cumischung da gestiun

La cumischung da gestiun è identica cun chella dalla RA. Ella examinescha mintg'onn igl rendachint e rapporta da chel alla conferenza digls presidents.

III. Finanzas

Art. 7 Onn da gestiun

Igl onn da gestiun cozza digl amprem da schaner anfign igls 31 da december.

Art. 8 Chint annual, preventiv e plan da finanzas

Per la SMGC vign mano en chint ed en preventiv separo.

Art. 9 Finanziaziun

Igls meds per adampleir igls pensums necessaris sa cumponan da:

- taxas da scola
- contribuziuns digls cumegns tgi on ena cunvagnientscha da prestaziun cun la RA
- contribuziun digl cantung
- donaziuns

IV. Disposiziuns finalas

Art. 10 Antrada an vigour

Cun l'approbaziun dalla conferenza digls presidents dalla RA, chel reglamaint vo an vigour pigls 29 da november 2019. El ramplazza tots reglamaints dalla SMGC d'anfignen ossa.

Casti, igls 29 da november 2019

la conferenza digls presidents:
dalla Regiun Albula:

igl post da fatschenta
dalla Regiun Albula:

Simon Willi, president

Roman Bergamin, magna fatschenta